


清·方略館 編

清代 方略 全書

北京圖書館出版社



清代方略全書



清·方略館編

北京圖書館出版社

清·奕訢等撰

欽定剿平粵匪方略

卷七五——八四

清同治十一年（一八七二）鉛印本

欽定剿平粵匪方略卷七十五 甲寅年

四年正月初二日

壬寅

僧格林沁奏言據慶祺函

稱上年除夕由靜海撲出逆匪三千餘名意在
向西潰圍須將西面兵力加厚方免疏失當卽
札令侍衛綢閣帶察哈爾官兵五百名前往協
堵旋准慶祺咨稱賊竄大城現在孫家莊梁頭
村東河頭均被賊踞是逆匪潛行潰出

臣欽奉

諭旨帶兵會剿因王慶坨乃北面極關緊要之地一經
撤兵恐逆匪乘虛北犯是以飛調多爾濟那木
凱將現統之兵兼程趕赴臣營原擬令在王慶
坨防堵今固安一帶旣屬萬分喫重仍飭該統
領在固安屯紮如探有警報一面由固安向南
迎擊一面飛報臣營卽由武清馳至固安攔前
截剿若西面竄出之賊或經殄除或經擊回卽

遵

旨移營前敵奏入

上諭曰前路逆情隨時探聽仍應會剿爲是現在西面雖有竄出之賊尙有伊勒東阿等儘敷防剿汝可速定進止接奉批摺卽行覆奏

同日勝保奏言上年十二月二十七日靜海海岸出賊數百人經我兵截回二十九日卯刻臣

親督兵勇攻壘該逆匿不敢出午未之間忽從
壘中蠡擁而前我兵四面抄擊殺斃賊一百數
十名賊勢潰敗入巢並見多賊棄刀下馬長跪
道旁我兵見其似屬投誠當於陣前招回十三
人供係提臣向榮遣赴賊中使作內應不意走
漏消息被賊拘禁見其技勇用爲僞官時在林
瀛詳左右屢思投誠今見臣解散告示始敢乘

勢逸出臣察其情詞雖出至誠然難保非賊詭計現擬暫緩其一死使知

國家恩威庶賊營被脅之衆聞風投散則逆匪不難殲除

勝保又奏言臣正拜摺間接據經文岱稟報上年十二月二十九日辰刻靜海西門突出賊匪二千餘名直撲烏征阿水營西路各營分兵接

應截殺逆匪多名賊匪轉向西南經文岱水營
西岸各營官兵及東岸崇恩之兵協力助剿經
文岱之兵亦卽下船迎擊賊敗向正西逃竄大
股截回靜海其零星匪數百名已越過冰濠不能
歸壘卽將水中于家莊等村占踞意欲探路奔
往王家口官兵現已將該村圍住請撥兵協剿
臣卽飛咨僧格林沁就近於西北一帶撥兵扼

要嚴防並咨令慶祺撥兵往助先將賊匪所搭
浮橋拆斷再行攻奪村莊臣尙恐兵力不敷又
派撥兵勇六百名馬隊三百餘名令其直赴王
家口相機協剿又飛咨西凌阿善祿於東西兩
岸迅撥步隊官兵一千名馳往西南一帶抄截
不使逆賊竄逸並抽撥馬隊一千名赴青縣以
北盧家園以南四五十里地方堵截如賊有竄

逸迎頭截殺至該逆由何路竄出客卽查明防守員弁嚴行叅劾奏入

上命軍機大臣傳諭勝保曰各路防兵屢次諭令嚴密堵截何以任令賊匪占踞于家莊等村究係向何路竄出著卽查明帶兵之員據實嚴叅此股零匪僅有數百人官兵現已將該逆圍困該大臣又派兵前往剿截務卽嚴飭各路將弁趕緊將此股勦洗淨盡儻

再有疏失任令竄逸惟勝保是問據奏進攻賊巢情
形屢云賊勢窮蹙粉飾鋪張敷衍塞責而至今賊勢
仍屬兇悍勝保督兵已逾三月尙未能掃穴擒渠自
問能無愧乎朕惟以勦滅賊匪爲憑豈虛言所能了
事著卽乘機進剿迅殄賊氛毋得再事遷延致干重
罪

同日袁甲三奏言賊匪新得廬州聞城內米糧

尙足火藥柴草均已缺乏乘其根基未定指日
以大兵臨之或可收功旦夕萬一根深蒂固又
將勞師糜餉應請

旨迅發大兵併力廬城剋期會剿並請明降

諭旨何人能用兵卽歸何人統帶不得以勢分相臨不

得以意氣用事提臣和春

聖心之所簡在踵江忠源之後者庶幾在此臣思江忠

源謀勇兼全此次孤軍嚴守三十六日卒以援
將不前而殞其命臣今檢其來書及咨會奏稿
皆一己盡瘁匪躬絕無一語歸咎於人若江忠
源者不獨可爲良臣直無愧古之純臣矣

聖恩於江忠源卹典之厚廕襲之隆當無復加查有其
弟江忠濟江忠濬隨同剿賊久歷戎行所帶楚
勇皆能用命應請

特旨激以公義動以私忿將江忠濟江忠濬等優予官職卽留安徽軍營會剿當可得其兄之遺意而備將材之選也並請速降

諭旨飭令曾國藩迅帶礮船並自練之勇五千人由湖北九江而來與北兵會合作水陸夾擊之勢又查有刑部郎中李文安奉

旨回籍督帶鄉勇協辦防剿現已行抵臨淮該員原籍

距臨淮一百餘里情形熟悉呼應較靈臣卽令
其駐守臨淮聯絡鄉團藉壯聲威可期得力
袁甲三又奏言查陝甘總督舒興阿於廬州告
警之初已蒙

聖明鑒及飭令赴援並令將所帶之兵酌分和春乃該
督擁兵自衛誓不肯分嗣接和春來信述及該
提督紆道親赴伊營面商一切該督堅持成見

不惟不分自帶之兵卽他人之兵亦不允其抽
調致令和春束手無策甫到店埠而廬城已報
失守江忠源以名將之才坐困危城不得不以
死報

國該撫守城逾月疊向舒興阿告急該督竟駐距
城三十里外之岡子集不肯前進況本月初十
日前後江忠源疊戰獲勝賊勢已衰城門時啟